



**Acampada Generala de l'IEO-06 en Bergier
lo 9 de febrer dau 2019**

**Rapòrt d'orientacion
per l'annada 2019**

presentat da Joan-Pèire SPIES, President sortent,
a l'Acampada Generala dau 9 de febrer dau 2019 en Bergier

Coma lo diguèri, l'annada 2018 siguèt rica de creacions e d'eveniments e d'avançadas e, per lo 2019, de projècts n'avèm, numerós...

Gardam li nòstri prioritats :

Volèm gardar lo nòstre engajament dins lu domanis dont sabèm que lo monde son implicats per la conoissença e l'espandiment de la lenga e de la cultura

lu cors, lu ataliers, li caminadas desuberta dau país, ...

Volèm persegre lo nòstre trabalh d'edicion, e de difusion de la lenga.

Un libre a venir en lo 2019, ne'n parlèri, lo libre que auguèt lo premi de literatura dau Vau d'Aran.

Per menar d'autres projècts d'edicion, aquò non pòu èstre lo trabalh d'una persona soleta. Recampar una chorma de sòcis alentorn d'aquestu projècts d'edicion nen permetria d'anar de l'avant e de donar a veire la lenga.

Per autre, demandèriam, coma editors, una plaça au Festenau dau Libre de Niça au mes de junh dau 2019, en mai de la nòstra participacion costumiera au Festenau dau Libre de Moans-Sartòus. Esperém que la nòsra demande (revovelada doi ans de temps) serà acceptada aquest'an.

Volèm persegre lo nòstre trabalh de creacion e de presentacion de lenga viva, (teatre, cant...)

Volèm contunhar a desfolopar lu nòstres partenaris, e recampar lo monde alentorn de projècts, per mostrar la vitalitat de la lenga, coma si faguèt per la dictada occitana a Niça – mai de 200 personas au licèu Massena, lo 26 de genoièr passat.

Volèm sostenir cen que si fa dins l'ensenhament public, que lo renouvelament de la nòstra cultura viva es en camin dins l'educacion.

Demandam sempre la firma/signatura de convencions tra li collectivitats (Consèu Regionau, Consèu Despartementau) e l'Educacion Nacionala per perenizar la valorizacion de la lenga e la creissença dei ensenhaments.

Siam fòrça atentius a la situacion de l'ensenhament a la facultat, a l'avaçada de li classas bilinguas a l'escola dei Portugalièrs, e demandam ja la mesa en plaça de la seguida au colegi Jean Giono.

Volèm faire viure dins li nòstri activitats li valors de tolerança, de respèct e de fraternitat.

Son au bèu de la nòstra vocacion coma associacion d'educacion populària.

Restam engajats dins aquesta dràia, continhuèrem, dins lu domanis de l'ensenhament, de la creacion, dei mèdias e de la vida pública a promòure un contèxto favorable a la recuperacion de la lenga, au restabliment de la transmission familiara e au desflopament dau biais de viure portat per la cultura e la lenga occitani. La nòstra accion a per amira la preservacion de la diversitat culturala e lingüistica e non pas dau replegament, e demanda lo respèct dei drechs de la lenga occitana per, tra autre, una « lei cadre ». Asperam una lei que permete una interpretacion que non sigue restrictiva de l'article 2 de la constitution, asperam sempre la ratificacion de la Carta Europenca dai lengas minorizadi per fin que lu esfòrç dei associacions coma la nòstra sigon sostenguts per li collectivitats publiqui.

Fa mestier coma jamai d'emparar ai ciutadans que mai de cultura, es mai de fraternitat !

Per autre, devèm capitar mai ben dins aquesto domani, vi prepau de li metre toti li nòstri fòrças :

Devèm recampar de monde alentorn d'un projèct de comunicacion : site, rets sociaux.

Volèm amplificar la mesa a disposicion de la lenga lo public, gràcias ai nòstri publicacions sus dau site, sus de Facbook. Avèm besonh d'una chorma per gerir aquò, Joan-Pèire Baquié, Marc Waltzer e ieu siam lests a formar de joves per pilhar la releva. Aquò fa mestier pour anar de l'avant. D'autant mai que la creacion dau veire e de l'audir farà partida de la vida de cada jorn de mai en mai, e serà un vector màger de la cultura dins lu temps que venon.

Vi demandi de prepauar de mesos per amplificar la nòstra visibilitat, emé de personas noveli. Demandi a cadun de faire de propòstas per anar de l'avant . Serà la prioritat per lo 2018.

En particular devèm interessar a la nòstra cultura de joves, lu formar, lu faire societar, son l'avenir de la nòstra associacion e de la nòstra vida culturala.

En mai d'aquò, devèm faire que lo nòstre bureu fague fonccionar coma si dèu l'associacion, siam tenguts de lo faire per anar de l'avant.

Per aquò faire, porriavam recercar la possibilitat d'aver una adreiça fixa de lònga, de corespondants pròche de li institucions, e bessai coma es estat prepauat la recerca d'un luec que nen permetria de modernizar la nòstra activitat de venda de libres, de gerir lo nòstre estòc que devèm pron important (quasi un milerat)

Per autre, pensam a la possibilitat d'èstre implicats dins un eveniment federator en lo 2019, que sigue una lieta per la lenga d'òc dins lo departament.

Vequí cen que seràn lu objectius de l'IEO-06 per l'an que ven, se votatz aquest rapòrt morau.

Avèm de mai en mai de demandas, que la cultura e la lenga fan nàisser la curiositat, la descuberta, lo plaser. Fan sens e remembran de ligams.

Avèm de fòrças :

l'IEO es una associacion pan-occitana. Podèm, coma li annadas passadi, trabalhar embé l'IEO-PACA au nivèu regional.

Travalham embé lo Forum d'òc que rapresenta una estructura soplada de propòsta e d'escambis.

L'IEO-06 recampa de sòcis de toi lu caires dau departament.
Avèm mantu contacts pròche dei colectivitats.

Mas avèm besonh de la participacion, de l'engajament de toi : ensenhaires, personas per lo site e li pàginas FaceBook de l'IEO-06, per l'edicion, per la libreria, per li relacions embé lo monde associatiu...

Es necite que cadun, en lo 2019, sigue d'una maniera ò d'una altra, engatjat mai dins la vida de l'IEO-6 e que l'i assegure una responsabilitat..

A cada sòci de si sentir implicat, a cada sòci de viure l'occitan au quotidian, de prepauar d'accions, de participar ai nòstri activitats, ai nòstri fèstas, de legir lu articles dau site, li nòstri produccions e libres divèrs, d'escotar de CD en occitan (li son de ràdios e meme 2 televisions sus lo malhum : òc tele e Té Vé Oc), d'anar veire mai d'espectacles en lenga, de faire societar d'amics per participar a l'espandiment de la nòstra associacion.

La lenga e la cultura occitani son l'afaire de toi. Cada sòci si deu d'èstre un ambassador de la lenga e de la cultura.

Auguri a caduna, cadun, una annada associativa bèla e rica de descubertas.

En Bergier, lo 9 de fevrier dau 2019

Joan-Pèire SPIES President sortent de l'IEO-06